

KIHUNDE – “Where is your home?”

## ABWIKALO BWAVE BULI HAI ?

Bangi mwitwe bawete manyumba neri hamwabo hobaluka mbu bwikalo. Halimo na mango abwikalobo butangakwira, neri mutangaba bikai bikwirire ngakuno bya muhwene aweteko. Wetuwe atunalukaho mbu hamwetu. Nakiro mbu shatutangula bandu, neri shatuya mu luendo, wetuwe nitwanamoia kubwishi bwa reata hamwetu. Ahandi handu hangakwira kutsibu, wetuwe tutalinganyaho na hamwetu hohatukokera netukohetsa, netubwerekya kututalinganyaho na handi handu. Halimo na mango ni ha ngundi yashibaaho.

### TULI BANDU BAHIKAA ITANGULA AKIHUO

Akinwa kya Ongo akitubwira mbu, “Twahikaa itangula kihuo. Tuli baeni kwa kihuo na baendiendi.” (1 Pet 2:11; Heb 11:13). Amanyumba metu ma kuno kihuo, nakiro mbu mahimbirwe kushe, wetuwe ma biro bike, inyuma wa biro bike ni matangira ishambukala. Amuyaa ni atsuka mwa nyukyo, na mwa malilisha. Na mwa ntsindiro anyumba ni yakunuka. Hatali nyumba kwa kihuo yoyangaleama. Ihi, anyumba iwete kianiro kyarebaho kyayo.



Hanyuma anyumbe'yo ni yaba mushaka. Ni ungaba ukesindera ku byobikutsungwireko, ni waxunga ku hatali kyokibwerekya ku kwa kihuo kuli kindu kyereama; abyoshe bindu byehera, manabe na mekalo metu.

## **IHULUKA TSENE, BULI MUNDU ALI NA BWIKALO BWA BIRO BYOSHE**

Tumenye neri tufundwe imenya, buli mundu ali na bwikalo bwa biro byoshe. Hali na bwikalo botwendeba nabo mwa mango abuingo bwetu bwendehwa kwa kihuo kuno, ali ya mubiri wetu atabwa mwe'sinda. Amyete yetu yendeya mwa me'kalo mayo, hotutendeba baeni. Wetuwe yendeya hotubaikala abiro byoshe. Hali bwikalo bobuahulwa mbu buli tikuno nyancha ya muliro wa kibiriiti, ho Andikirisitu na batahwa ba bubesi bali. Nomo mo Shitani na bandu boshe ba matsina mabo mataandikirwe mwa kitabo kya buingo bendeba. (Xwikulo 20:10-15). Mwa mifumba mitsibu ya muliroyo, na mwa kyuka na mwa bwaale, mwendeba milake neshia meno. Abusu bwa Shitani bwendebwerekya ku ashekenyula bobali mwa minubo. Hatendeba yangabongabongabo neri yangaasikyabo. Bobachirirwe alubancha bendeba bonabene mwa minubo kubwishi batatsimbaa kwa Kinwa kya Yesu Kirisitu. Amifumba ya muliro, aminubweyo, ahandu aho hohalukwa mbu kutsimu, hohakendeba bwikalo bwabo kubwishi: "Aboshe bakolire ntsambi nekeherwa na ngulu ya Ongo." (Rom 3:23). Bwikalo bwa bakulukulu ba micho mibi, bobaimanikira bipfutsa, na bobakola bukupi, na bobali na buxu mwa myete yabo, bobapfa lui, na babesi, na batamitsi, na betsi, na bandu batulimi tubiri, na bobatangainhirwa, na beti, na babangani, na balombe, na bobanaitundulika, na bobatsiire bindu bya kihuo, na bairiritsi, na bobatsiire abitwe. (Ngal 5:19-21; Xwikulo 21:8). Ino yo nyumba ya bobatindaa Ninakuwetu Yesu Kirisitu ngakuno Muufutsi wabo, bobatangire bakomibwa mwa shiama ya Kirisitu. "Mutatingwaa, bataalita ne Ongo. Kyo mundu abyalaa kyakendexola." (Ngal 6:7). Kyotwabyalaa mwa ntsambi na mwa mubiri twendepfunakyo yi kutsimu.

Imana usindere kwa mukotsi wa santsambi aenda mwamwe, kureba atatangire aikiritsa Muufutsi wetu Yesu Kirisitu. Amukotsi wa santsambi yatsibuhitse amwete uwe, nianaba ku lwepfa ni atilinde aikiritsa ku Yesu yo nchira na buingo buwe. Mwa mubiri muli bwaale, na mwete auchwire buba bwa lupfu. Na lupfu nalo ni lwahika mu kashangi katalindiralomo. Atulabwa na sambusha sa mubiri niasinalwa. Nianapfuha bibi biwe byo kichiro kinene. (Rom 6:23). Aminubo ye'kutsimu niainatsungula mwete na mutima. Nakiro mbu saxonda ihema, ni atiale ipfula ku Ongo. Bera bewe baxondotsi baubahire iipfunda hofi na ngingo yiwe. Na binwa byabo bya mikocho bitangakimuasa. Binabe na bitwe byoshe byali nabyo bya bwitsi, bitangaufula mwete uwe, neri iupfuhya bwaale buwe. Abitwe biwe bitangaongerera buingo buwe. Shitani atangamuha kashangi keanitsa binwa bya Ongo. Abyoshe byabaa atsiire bya kwa kihuo byahara bya busha, byahara ngakuno abimushekenyula. Anabe na musumba uwe wa kwa kihuo, naye atangakimuasa. Aharaxunga ku "**Kinwa kitsibu kwe'toera mwa minwe sa Ongo yaliho.**" (Ebur 10:31).

Abaa echi mbu angaitengya ku Ongu, kwa ngingo ya lupfu, kuntsi hatakiri kashangi. Bandu bangi abapfa mu kashalimo butsira ikorana ne Ongu. Kyokinatuma batuhana ixonda Ongu mwa mango angakinaboneka. (Isa 55:6). Hangaumpfirire abinwa bya muisha na ntsii ya Ongu, mwa buingo buwe, tsene ahara ahulikya mulenge wa Muchamancha, Amuufutsi uwe. Muye naye amubwira mbu, “Mutoke mwa mbere sani, mwomwatukangirwe, muye mwa muliro wa biro byoshe, wachanwaa kubwishi bwa Shitani na bixwatsi biwe.” (Mt 25:41). “Abandu babikirirwe ipfa iiuma, na hanyuma kwaho ni kwahika ichirwa lubancha.” (Ebur 9:27).

## **TSENE, TULOLE NGAKUNO BUHE BO BWIKALO BUBUYA**

Mwa bwikalo'mo mutali mutsimya na kiro. Na kandi mutendelawako ku itala na kyaka. Kubwishi Ninakuwetu Ongu yakendekoletsabo. (Xwikulo 22:5). Wetuwe nga kokiandikirwe mbu, abindu byoshe byobitatangire byalolwako na lisha, na bindu byobitatangire byaumpfibwa nekwitwi, hate na mundu yatangire aanikira bindu ibyo. Ongu akoleraabyo bobamutsiire. (1 Kor 2:9).

Kwa kihuo kutali kiro na muneenere wangaahulwamo angulu ya mu mbingu, kureba mu mbingu mukwirire kutsibu. Akihuo bwikalo bwa bandu bobakola ubi. Hatali kiro na mukotsi wa ntsambi yakendeingiramo. Mu mbingu mutibaingire kindu kihalire, neri mukotsi wa ntsambi, neri mubesi. “Mukanendeingiraho bobaandikwaa mwa kitabo kya buingo kya Kyana kya Mbuli.” (Xwikulo 21:27). Anyumbe'yo utangaulayo mu bitwe neri mwikolerayo. Unganaingiramoho nwe'imirira ku Yesu ye Muala wa Ongu na Muufutsi wawe. Hatali kiro na mbero ya Kanisa yoyangakingitsamo. He abwimireho na mikolere mibuya tukinali kwa kihuo. Yesu Kirisitu abulaa mbu, “Niri nchira, na kuli na buingo. Hatali yangahika iramwa Tata atatsukire yo niri.” (Yoh 14:6). Twasoma mu (Yoh 14:2), Yesu aahula bwikalo bwakola. Wetuwe abwikalobo bwa bandu bobashashirwe asantsambi sabo, na myete yabo ikomire. Bandu bangi banaitonda mu ngimba mbuya mbu kuti sangatuma baingira mwa Paratiso. Asangimba na mubiri bindu bya busha. Kyokilaitse ni amwete wahemwa ikomibwa. Na buingo bwetu nabo, ni twaba nabo mu bukome. Ni tutikulikire abinwa bya kihuo.

Tukexunga ku tweboshe tuli bakotsi ba ntsambi mwa mbere sa Ninakuwetu, na ku atuya yi kutsimu, ni hanameshiba kindu kiuma kyotwangakola, “Ni tungaba tukeikiritsa santsambi setu, iye weinihirwa netunganana kwetushashira asantsambi setu, na kwetukomya mwa bibi byoshe.” (1 Yoh 1:9). Yesu abulaa kandi mbu, “Ingye niri arepfuka na buingo. Na yakaniimirira endebaho nakiro mbu amepfa; na kintsi yaliho na ali aiimirire atendepfa kiro na hake.” (Yoh 11:25-26). “Yakahulikya kinwa kyani neimirira yanitumaa, uyo ni yali na buingo bwa biro byoshe. Ni atibachirwe lubancha, he ni atsuka mwa lupfu neingira mwa buingo.” (Yoh 5:24). Amukirisitu atashushire iubaha lupfu. “Kureba lwamerirwe na rehima! Era! Lupfu arehima rawe liri hai?

Ee, lupfu abwaale bwawe buli hai? Abwaale bwa lupfu ni antsambi, na sanyiki sa ntsambi ni amuomba. Wetuwe Ongo asinge yatuma tuhima mu Ninakuwetu Yesu Kirisitu.” (1 Kor 15:54-57). Amundu yabaho netamba kuuma ne Ninakuwetu ataubaha lupfu. Mwa mango aluendo luwe lwahika, ni aenda ni amoire ngakuno kwa ndumwa Paulo abulaa mbu, “Nitsiire iendera iba kuuma ne Kirisitu kubwishi iro likwirire irengya bindu abyoshe.” Amukirisitu axonda ixunge abusu bwa Kirisitu yamupfira kwa musalaba. Na Mutima Komire nao amuubukya abinwa bya Yesu mbu, “Amwete wawe atairirikanaa kiro na hake. Imirira Ongo, ubeneniimirira. Mwa nyumba ya Tata muli mekalo mangi. Ali lute lutyo nge nababwirire. Naenda ibakolera bwikalo, nendefuluka ibabingha kwebula mbu honiri nemwe ni mwabaho.” (Yoh 14:1-4).

Tsene tutangetwatindira hake, tulole kwa mukirisitu aya mwa bwikalo buwe. Hangaubahirire alupfu, ni kwahika malaika neri ndumwa ya Ongo kwetwala mwete uwe iramwa Ninakuwetu. Amwete na mutima ni yatenga mwa muntu wa lupfu nelibitanga mwa nyukyo sosikingwirwe sa mwa Paratiso nekokerwa na yamupfira. Ikokerwa ra kishaaluko mwa mbere sa Ongo, neyo niaketsibwa mwa binwa bino, mbu, “Wamekola, mukotsi mubuya na weinihirwa; wainihirwaa mu bindu bike, tsene nakuha bindu bingi. Ingira mwa mwime bwa Ninakuwenyu!” (Mt 25:21). Ihuluka tsene Shitani atakiwete ku angakuira, kureba, “Basimirwe abapfu bobapfa mu Ninakuwetu, ihuluka tsene! AMutima Komire abula mbu, Naki, kwebula mbu batamuke mwa mirimo yabo, kureba amirimo yabo yekulikirabo.” (Xwikulo 14:13). Tsene wangakoche’kola nga kwa mwana yaheraa akolaa, mwa mango abaa hale na hamwabo, ali yaxunga kwa buingo buwe bwamepfa busha, nianabula mbu, “Nabatuka niende iramwa Tata.” (Luk 15:18). Mo kashangi muno tereka buingo bwawe mu Yesu. Iro’tyo tsene, aho houli. Shinga mapfi mawe ubeneikiritsa santsambi sawe, ubwire Ongo ku uli mukotsi wa ntsambi. Umubwire mbu akuhotse mwa shiama ya Yesu. Ashiame’yo ya kichiro kinene. Umuikiritse mwa buingo bwawe. Bwerekya Shitani amuongo. Futatira Shitani na nchira yoiire kutsimu. Tsene tsimba nchira ya bwikalo bwawe bwa mu mbingu. Nchira ya buingo bwa biro byoshe.

---

**Si vous avez trouvé le salut en Christ ou si vous avez été béni par notre littérature, nous vous prions de nous le faire savoir. Nous aimerions remercier Dieu avec vous et prier pour vous.**

**Pour obtenir gratuitement de la littérature évangélique, des livres et des traités en plus de 540 langues, écrivez à:**

**E-MAIL: [info@angp.co.za](mailto:info@angp.co.za)**  
**ALL NATIONS GOSPEL PUBLISHERS**  
**P.O. BOX 2191, PRETORIA, 0001, R.S.A.**  
**(Une Mission de Littérature évangélique financée de dons)**  
**(Reg. No. 1961/001798/08)**